


名賢氏族言行類稿

四

031
S0030
4

七言詩



總校官進士臣朱鉉

校對官中書臣張曾炳

謄錄監生臣安樂宇

欽定四庫全書

名賢氏族言行類稿卷八

宋 章定 撰

于 百五十一

姓纂周武王第二子邪叔子孫以國為氏其後去邑
單為于氏 東海漢有于公生丞相西平公定國生

永御史大夫

前漢于定國字曼倩東海郯人也父于公為縣獄史郡

曹決獄平郡中立生祠號曰于公祠 言殺孝婦而旱
定國學法于父亦為獄史以材高舉侍御史遷御
史中丞起為廷尉朝廷稱之曰張釋之為廷尉天下
無冤民于定國為廷尉民自以不冤 遷御史大夫
為丞相封西平侯 子永嗣至御史大夫 始于公
其閭門壞父老方共治之公謂曰少高大令容駟馬
高蓋車我治獄多陰德未嘗有所冤子孫必有興者
至定國為丞相永為御史大夫封侯傳世云

魏志于禁字文則攻張繡禽呂布圍張超攻眭周皆破
斬之太祖曰將軍在亂能整討暴堅壘有不可動之
節雖古名將何以加之

北史于栗磾少習武藝材力過人 劉裕嘗遺其書題
曰黑矟公麾下栗磾好持黑矟故有其號明元因授
為黑矟將軍 自少總戎迄於白首臨事善斷所向
無前 謙虛下士刑罰不濫 子洛拔為侍中尚書
令百寮憚之任參內外以功名自終 洛拔子烈善

射少言有不可犯之色累遷殿中尚書 氣槩沈遠
有柱石之質殆禦侮之臣乎

于忠字思賢累遷散騎常侍嘗因侍宴宣武賜之劒杖
舉酒屬忠曰卿世執貞節故恒以禁衛相委昔以卿
行忠賜名曰忠今以卿才堪禦侮以所御劒杖相錫
後為尚書令

于勁字鍾葵為定州刺史自栗磾至勁累世貴盛一皇
后四贈公三領軍二尚書令三開國公

于謹字思敬畧窺經史尤好兵書或有勸之仕者謹
曰州郡之職昔人所鄙台鼎之位須待時來累官
至大司寇負佐時之畧逢周文興運之期為大厦
之棟梁擬巨川之舟楫卒以耆年碩德譽高望重禮
備上庠功歌司樂常以滿盈為誠覆折是憂謹為
三老賜延年杖武帝幸太學以食之謹既平梁周
文令司樂作常山公平梁歌十首使工人歌之名
位雖重愈存謙挹功臣中特見委信始終若一人無

間言 子孫繁衍皆至顯達 子實

于實字賓實累遷尚書 實子顥字元武拜吳州總管
以頻敗陳師賜綵數百段 弟仲文字次武九歲嘗
於雲陽宮見周文帝問曰聞兒好讀書書有何事對
曰資父事君忠孝而已周文甚嗟歎之 後為安固
太守州刺史屈突尚坐事下獄無敢繩者仲文窮之
遂竟其獄蜀中語曰明斷無雙有于公不避彊禦有
次武 實弟翼字文若為渭州刺史實先莅此州翼

又推誠布信事存寬簡夷夏感悅比之大小馮君
後為安州幽州總管翼兼文武之寄受干城之託智
能足以衛難勢力足以勤王曾無釋位之心但務隨
時之義弘名節以高貴豈所望於斯人子璽字伯
符隋初歷汴邵二州刺史並有恩惠翼弟義字慈
恭仕周遷安武太守專崇教化不尚威刑郡人爭財
相訟義以家財分與二人喻而遣去二人各懷恥愧
移貫它州子宣道字元明仕隋遷內史舍人宣

敏字仲達年十一詣周趙王招命之賦詩詩甚有幽
真之志坐客莫不嗟賞仕隋拜奉車都尉奉使巴
蜀還上疏帝嘉之曰于氏世有人焉常以盛滿之
誠昔賢所重每懷靜退著述志賦以見志焉

節義于什門魏時為謁者使馮跋不拜拘留二十四年
後歸拜侍書御史

唐于志寧字仲謐京兆人貞觀三年為中書侍郎晉
王為皇太子拜左庶子監修國史與張行成高季輔

俱賜田志寧辭分其田以與二人 凡格式律令禮
典皆預論撰 與司空李勣修定本草并圖合五十
四篇其書大行

于休烈志寧曾孫機鑒融敏善文章第進士又擢制科
歷祕書省正字 肅宗立兼修國史 時經大盜後
史籍燔缺休烈奏獻史籍進官 獻五代論詩著舊
章天子嘉之 雖歷清要不治產性恭儉仁愛樂賢
好善推轂士甚衆年老嗜學不厭

于頤字允元後周太師謹七世孫有專對材為湖州
刺史有湖陂久廢命修復歲獲秔稻無慮萬計改蘇
州為政有績為陝虢觀察使寧吏重之貞元中
拜山南東道節度使吳少誠叛頤禽其將昌黎先
生有上于襄陽書又送許志雍序云是非忠乎君而
樂乎善以國家之務為已任者乎即頤也

于公異進士擢第李晟表為掌書記朱泚平露布於德
宗曰臣既肅清宮禁祇奉寢園鍾簾不移廟貌如故

帝咨歎一再

蘧百五十二

姓纂衛大夫蘧瑗字伯玉之後漢大行令蘧正左傳定公十年宋公子地嬖蘧富獵十一分其室而以其五與之

論語君子哉蘧伯玉邦有道則仕邦無道則可卷而懷

之

家語外寬而內正汲汲於人以善自終蘧伯玉之行也

舒百五十三

風俗通云舒子之後以國為姓

唐舒元輿婺州人元和中舉進士見有司鈎校苛切既試尚書雖冰炭脂炬食具皆人自將吏一倡名乃得入列棘圍席坐廡下因上書言古貢士未有輕於此者俄擢高第裴度表興元書記文檄豪健一時推許拜監察御史自負才有過人太和五年獻文闕下不得報上書自言所上八萬言其文鍛鍊精粹出

入今古數千百年披剔剖抉有可以輔教化豈主父可比哉元興唐中葉文士也今其遺文所存者才

二十四篇既以甘露之禍死文宗因觀牡丹摘其賦

中傑句曰向者如迂背者如訣折者如語含者如咽

俯者如怨仰者如悅為之泣下予最愛其玉筋篆志

論李斯李陽冰之書其詞曰斯去千年冰生唐時冰

復去矣後來者誰後千年有人誰能待之後千年無

人篆止於斯嗚呼主人為吾寶之此銘有不可名言

之妙而世或鮮知之

見容軒隨筆

宋朝舒亶字信道明州慈谿人也擢進士調臨海尉民有使酒逐其叔母者亶命執之不服即斬之投劾去王安石當國聞而竒之為審官院主簿熙河路分畫疆界命亶馳往于時洮隴新喋血亶即日引道至則示以朝廷威信夷人以肉置刀頭啞亶亶以口承之衆皆歡呼使還提舉兩浙常平召為太子中允御史裏行崇寧初辰州蠻叛以直龍圖閣知荆南府